

四庫全書

集部

欽定四庫全書

集部

新安文獻志卷

四十九
五

詳校官中書臣丁榮祚

侍讀臣孫球覆勘

總校官庶吉士臣倉聖脉

校對官中書臣吳甸華

騰錄監生臣吳炳文

欽定四庫全書

新安文獻志卷四十九

明

程敏政

撰

辭

毘陵張先生哀辭

代呂榮
公作

汪 革

毘陵有隱君子曰張先生孝弟成於家忠信行於友而
聲名聞於人達於遠近當世之鉅公偉人莫不聞之有
過毘陵而不造先生之門者人以為耻平居蕭然自得
凡世人之所趨而向者先生不一經意至與之酬酢則

無一毫不中節度有勸之仕者推輓雖甚力終不應非若前世隱遯之士事詭激甘槁薄臞悴於山岨水涯窮居獨遊使影響不間於人然後為高也自少力學於古書無所不窺時發為詩語皆清新出人意表其善為筆劄天性也年既壯益放棄世事遂以終其身是可謂君子也已先生諱舉字子厚用叔祖天章公昱之奏補郊社齋郎治平四年科調青溪主簿先生初無意於仕也既無兄弟之助獨養其親故力取科第以慰親志既得

又不忍舍朝夕之養從祿於他郡遂不赴青溪終其身
人不能相吏後近臣薦起為潁州學官復不就孫莘老
胡完夫范淳夫及外臺交薦其能蘇子瞻亦數言於朝
於是勅郡縣以禮遣蓋將用之也先生終不屈嗚呼今
死矣予自幼時已異先生而親厚之先生亦喜從吾遊
及長且老相與之意益以篤故其死也予哭之尤哀曾
祖秘給事中祖益尚書郎父次道朝奉郎辭曰

維古制行必中庸兮出處用舍道之從兮降及末世戾

不通兮首陽柱下更拙工兮山棲木茹初無庸兮鳥獸
之羣烏可同兮偉哉先生蹈厥中兮達不苟進退不窮
兮以仁為爵峻且崇兮祿雖不富義則豐兮忠信孝友
施家邦兮載瞻眉宇心則降兮激貪敦薄助孝風兮固
非亂倫而潔躬兮惠泉遶繞山複重兮窅然其深如有
容兮桂枝相繚藉青葱兮先生之廬今一空兮目極東

南涕霑眉兮伸之以辭寫予衷兮

按汪氏有兩名革者其一自歎遷撫州紹

聖四年進士號青溪與呂榮公相友善其一居婺源咸淳四年進士此文實青溪代榮公作見紫微詩話而汪

正心淵源錄歸之咸淳進士
相去二百餘年失之遠矣

懷忠辭

并序

程俱

顏公之節不待淮西而後顯此中人以上曉逆順立然
諾者槩能之非公之所難者而其忠義之性乃在於從
容食息之間常有愛君憂國之心不以顛沛易其操蓋
所謂招之不來麾之不去如古社稷之臣者方開元天
寶時天下久無事縣官自視有泰山之安獻替可否之
論不復至於朝廷一旦有緩急相與北面臣賊者皆前

日高車大蓋出入廊廟都俞和附之人而伏節死義之
臣顧出於疏遠無聞之地其隱然以孤城抗賊鋒者顏
氏弟兄而明皇未之識也向使數人者用於朝我冠綬
帶而敵人不敢謀矣惜乎公之壯不得為彼以名一代
之良臣不幸白首至大官更肅代德宗世政益紊憂益
深雖搶攘板蕩之際而常持憲秉禮尊王守官曾不為
少貶其惓惓之意豈惡安逸而樂羈危誠忠義激於內
也公之言行益危而嫉公者益急自乾元後連斥醜地

歲歷十二辰走半天下中間還之朝席未及煖又襍被而南矣觀其愛君之心如伯奇申生孝於親逐之不忍去讒之不知避之死而無二也忘者知其流離窮餓不足以懲也則委之豺虎甘心焉其勢必至於此蓋無足驚詫者詩稱仲山甫既明且哲以保其身又曰柔亦不茹剛亦不吐不侮鰥寡不畏彊禦而漢唐末流至假明哲以自便方以柔順緘默為賢烏在其剛不吐也且詩胡不曰既柔且默以保其身哉夫唯明不足以燭理哲

不足以知人而當山甫之任其得全身者幸也若公之見善勇義殺身成仁其於輕重取舍不既明且哲乎其所以保身者固存也不如是則是關播盧杞之徒合於山甫之美而賢於顏公之節矣予遊吳興拜祠下肅然想其餘烈退為文以頌之名曰懷忠上言公窮而無悶故能從容是邦適其適而紓其憂遠而不忘君故其憂未嘗不在王室也中言公不能與世浮沉卒放棄窮極見笑於頑佞之夫下言公之精誠當與天地長存雖死而

不亡也庶幾千載之下幽人志士尚能薦芳洲之蘋酌
茗溪之水歌此辭以祠公云其辭曰

返吾輶兮巴山釋吾擢兮揚瀾歲晚晚兮道阻修望長
安兮未還聊駕言兮出遊攜美人兮山之幽撫雲霄兮
遐觀恨辰莫兮淹留誅蕞管兮出秀寄雅志兮巖丘蹇
春洲兮白蘋擢青桂兮冬榮野無人兮誰芳君不御兮
安薦予之潔誠抱沈憂兮永歎障西風兮夕塵

其一

辟食兮侯居朱輪兮塞塗世以是為得兮胡不能飽妻

子而全軀狙利兮抵熾鉤時君之嘖笑兮於睫與眉世
以是為才兮胡獨徑行而不回豈形羣而情異兮何惡
逸而幾危紛肩摩而轍結兮誰不乘君車而衣君衣奚
獨好乖而多事兮耻時之不堯舜與臯夔羌以生而易

義兮幾何而不謂累之狂癡

其二

狐蠱兮蠅營夜慚景兮晝畏人生奄奄兮悵悵習無知
兮害塵展伊人兮超然何虎兕與甲兵忠為骨兮義以
為軀元如生而血為碧兮信前修之不誣髮之鬢兮蒙

茸顏如丹兮渥腴雖錮九泉而壓崧岱兮亦將馭飛龍
而撫八區與日月兮齊光極河漢兮爭流左吾颺兮洪
崖右吾歛兮遠遊慰我人之思兮儻復過峴山而稅蘋
洲悵神交兮千載覽陳蹤兮夷猶

其三

獻占辭

程俱

予數奇多故常有意外之慮春秋輒問占於筮人以知
一歲之衍忒春占遇蹇之咸秋占遇蹇退而歎曰物固
有有足而不得行無心而能感者枯草豈欺予哉作獻

占我從筮人訊之占只分策定卦遇蹇之咸只曰此蹇
險在前只不利東北利西南只遠險無咎近則愆只矧
其乘之蹶以顛只子行實難良未央只若臨巨川無舟
梁只苟惟載之冰崢嶸只大山屬天登無車只雞栖或
存雪塞塗只孟烏更輓莫進寸只匹離持之墮千仞只
蓋其貞則良悔則坎只止以有待毋乘險只若將終身
勇於不敢只苟當於位無心而感只子姑休乎遯以無
憾只我惟厥占體則宜只我行孔艱孰其尸只凡人之

生無巧愚只與接為構唯其逢只遇合則吉畸則凶只
適成則智敗則庸只竊鉤者誅竊國封只注金則拙注
瓦工只直木先伐材之災只不鳴之烹反以不材只畫
蛇於地惟敏之求只有加其足以敏為尤只墜鼠中會
被深仇只點蠅非意得妙賞只宋人之瞽福於患只狼
子之葵承其反只橫海之鱣制螻蟻只伏雌之卵為豺
虺只探物囊筭猝然失只志禽雲漢往則克只引之或
墜抑或伸只戚之或疏仇或恩只同生竝處為參辰只

絕域異世為金蘭只或談王道目蜚鴻只或相狗馬喜
見容只一言意合澤六宗只歷說白首不羸其躬只外
物不必古則然只有生之變不勝量只君子所蹈惟其
常只反身修德器則藏只進不如需健以光只退不為
困拚以剛只靈著之告亦孔之明只利見大人得中行
只

和歸去來辭

汪大猷

歸去來兮謫居三年今得歸荷聖恩之無終棄徒感涕

以成悲每自訟其前謬雖駟馬而莫追既脫名於丹籍
亦兩忘其是非念昔叨於朝列曾無補於宵衣佩乾坤
之德厚恨蛇雀之報微眷予衰晚流年似奔亟理征擢
前趨里門松楸在望親戚俱存問訊三徑放懷一尊洗
曾中之磊塊回暮景於韶顏將無往而不適故雖貧而
亦安忘勢利之汨沒絕人事之交關歎世路之嶮巖鑒
止水以默觀顧禍福之倚伏乃天道之好還相前哲之
遺訓常思奉以周旋歸去來兮蓋嘗聞之少游取衣食

之裁足何盈餘之苦求與其身之可樂孰若心之無憂
兄弟羣居於弊廬伏臘仰給於先疇園有名花湖有扁
舟免尚營於三窟狐猶念於首丘矧吾生之漫仕唯委
順以乘流久倦游而樂閑亦至是而宜休已矣乎聰明
不及於前時何必霸越而封留豈不能隨遇而安之達
哉白居易樂乎榮啓期存方寸之餘地付子孫以耕耔
庶幾安分之義無愧式微之詩惟知足之常足適翁歸
去樂無疑

適齋先生自南康歸喜而作是辭蓋不期於
工而自工也門人趙汝愚敬為之書時淳熙

丁酉十一月八日 大猷負罪謫居既蒙寬恩許還田里即日治歸道中嘗擬和淵明辭以寓驩欣感激之意舟次千越遇故人趙子直携酒來過勤勤相勞苦酒半乃為作大字適齊成遂刻之壁間足以華其老矣淳熙己亥十月望識 蹇蹇尚書志不羣岩岩相國政多聞搗辭信足追元亮灑翰真能逼右軍二世勲庸昭簡冊一朝人物際風雲只今臺閣需名裔莊靖承家有漢文虞集書

招隱操

朱熹

南山之幽桂樹之稠枝相膠高拂千崖素秋下臨深谷之寒流王孫何處攀援久淹留 聞說山中虎豹晝嘯聞說山中熊羆夜咆叢薄深林鹿呦呦獼猴與君居山

鬼伴君遊君獨胡為自聊歲云暮矣將焉求思君不見

我心徒離憂

右招隱

南山之中桂樹秋風雲冥濛下有寒栖老翁木食澗飲
迷春冬此間此樂優游渺何窮 我愛陽林春葩晝紅

我愛陰崖寒泉夜淙竹栢含煙悄青葱徐行發清商安
坐撫枯桐不問簞瓢屢空但抱明月甘長終人間雖樂

此心誰與同

右反招隱

鳴水洞辭

王炎

艾西有澗水自黃龍山西流達于巴陵郡之平江而注于湘水平江故羅縣以地志考之此水即汨之原也其間泉石最佳處曰鳴水洞青山中裂水行石上懸注崖下為瀑流遠望之如曳縞素迫視如撞瓊玉而碎之瀑布上水徐行則皴綠度石齒間多沸白如操琴筑音又其上石絕水為疊石之窪大小不一皆如古樽壘錡釜狀與石爭怒聲瀕洞如風旋雷吼兩崖皆峭險不可陟降蒼松數百株相扶瘦立枝格偃屈據木末俯眈崖下

使人神淒髮豎有蕭然遺世之意崖上有轉雷亭韓舍人子蒼作而名之歲久亭壞惟故址僅存沈粹卿攜酒邀予遊其上愛其景清甚欲去復留予不能飲亦累數觴不醉薄莫始歸粹卿曰此境視之不減匡廬三峽畫之當勝輞川惜其在窮山深谷人無知者移而近通都大邑其價可值萬緡予謂泉石之奇絕山靈愛護留以遺幽人勝士非求知於世俗也馬蹄車轍不至山間乃能全其清爾粹卿以予言為善因識其大槩而系之以

辭曰

艾之西兮汨之原山石劃斷兮窮嵌而嶄巖瀑流下注
兮其上絕而為疊有蛟有龍兮伏而不怒雷鳴崖下兮
窮年風雨誰斧鑿此雲根兮遺予以罍洗松有樛枝兮
屋之深深苔蘚斑斕兮織績以為茵觴酒于上兮聽潺
湲西岑銜日半規兮徘徊猶未忍旋子欲絙朱絲兮節
清音而度曲招玄鶴使舞兮醉予醺醪有玉韞積兮幽
人之軸秋蘭之佩兮芙蓉之服瘦石寒泉兮矢其弗告

四塘無隙兮嶽嶠青青白雲漠漠兮截洞口以為扁輪
鞅莫來兮無傷我清不執券而兼并兮莫予與爭

歎烏聊山忠烈廟享神辭

汪夢斗

至元十八年辛巳歲春正月祁門寇作總管中順大夫
趙侯管軍宣武將軍甘侯提兵往討平之凱旋趙侯延
見吏民曰噫嘻爾所謂越國汪王神者始吾未知其何
如神迨祁門告有亂者甲子及甘侯護偏師以往入春
苦淫雨至是雨甚泥淖載塗士馬艱於行乙丑至邑雨

益其人謂邑距賊巢尚百三十里山路崎嶇若未霽兵
行尤不易吾惟兵貴速少遲賊或披猖平民受害滋夥
因念邦人每詫越公之神為果有靈其能請于上帝轉
雨為霽使吾事亟集則神平昔受廟食有爵封命號享
民牲醪之奉始無愧夜午雨忽止翼日丙寅昧爽清飈
徐興氛霾盡解霽景沉空徒旅踴躍賊出接戰一進挫
其鋒再進離其羣三進薄其境一日間直擣其穴而平
之訖事復雨夫雨與霽懸於天非越公其神其能密贊

大造開闔陰陽豈遽與吾意之所期者應可謂靈也已
吾將紀其事于石以諭諸文學掾汪夢斗曰子其序之
夢斗謝不能然念神名氏見於唐新書與通鑑掌在太
史官閱見於武德貞觀所賜贊書今猶藏於廟事跡世
系見於州志家乘尤備至於時主之褒表公卿大夫之
記頌刻在金石奚庸贅一辭抑稱揚其先祖之美而明
著之後世孔悝固不得讓於衛君也系以侑饗之詩一
篇其辭曰

迷樓枕汴日晝暝隋鹿既走睡不醒四海糜沸水如腥
鄆山之流何泠泠農桑晏然彌野坳父子相保無伶仃
登源萬山圍重屏蒼籙支盾猶晶熒五雲擁下人亭亭
挺生英武辰適丁如鏡發光刃照矧美髯豐骨聲隱霆
驅斥羣盜橫青萍出車彭彭馬駟駟令行六郡水建瓴
真人有作清四溟默識厯數符天星亟奉圖籍款帝庭
絨節錦纛腰紫綬榮光陸離下垂廳有詔入覲馳朱駟
藻裳近拂堯階裳身綰素鞬扈禁扃俄然賓空蛻遺形

歸乎有鶴梳雪翎雲嵐一丘藏幽銘岡松久矣生茯苓
遺黎追思猶涕零當年作廟山之陘烏聊高哉屋瓏玲
庭隆露林飛螢燈磴薛梯颺躡玲塤直下千尺俯長汀
綺霞樓觀綃霧櫺堂室千柱門萬釘歲時芳薦羹有鉤
工祝執冊登俎鯨香騰爐火花注瓶汎徵流商列歌伶
和之筍簾聲琤琤陟降屢舞身娉婷雲車彷彿環令令
仙風鏘然韻流鈴依忠依孝見占筮畫像不犯草滿囿
密贊大造機不停疵癘蠲除無蝗螟福祥來下孚羣聽

邦侯表章述德馨我昔兵度山之營轉雨為霽近在覲
蚤取鳴臬正典刑作辭深刻堅珉青異彼淫祀若涓涇
歛山可頽水可渟盛德不磨揚厥靈稽首天子壽萬齡

聖政於赫七六經皇圖鞏固山河寧

疎齋盧公讀此文亟加賞與

婺源龍首山世忠廟迎送神辭

汪曙

徽之屬縣為婺源縣人程氏代為著姓至順癸酉程氏
之尊且賢者曰供祖一旦聚宗族子姓議建其三十四

世祖陳鎮西將軍開府儀同三司謚忠壯公諱靈洗祠于縣北龍首山以永慕思嚴祀薦曰世忠之廟仍宋欽之黃墩故號也既成其子質走京師謁記于今翰林揭先生記次詳實辭約而義豐矣後至元丁丑質將歸刻石置廟中過舒復徵文汪暘因為作迎送神樂二章使歌以侑祭云其辭曰

於楹楅兮閑挺血靈宮兮扶神筵神之來兮靡期降于天兮格思赫神威兮在上凜遺風兮惟忠以壯神之像

兮廟存欽若烈祖兮侯神孝孫雜芳馨兮薦裸牲肥幣
量兮祖籩匪亂神之靈兮孔嘉穆孝孫兮克禋罔諱神
之歆兮醉飽錫福子孫兮俾臧壽考咽簫管兮鏗鏞鼓
靈鼉兮載雄神忻忻兮委貺聆聆盱纒兮安從

烈祖降兮孔神肅靈風兮中人神之駕兮既飭儼將旋
兮日夕秩秩兮浩歌神之聿歸兮降福已多山紆紫兮
水匯竹樹擅藥兮澗湍澎湃池有月兮井有瀾神胡不
留兮去復盤桓勾萌兮甲坼此何時兮春王正月孝孫

卷四十九
祀兮有常神降福兮豈其渠與翼我兮佑我老壽熾昌
兮若山暨火貴則高兮富則強宜爾族家兮施于一邦
猗孝孫兮敬祀無怠何千萬年兮顧瞻神旆

倚山書院辭

唐元

倚山書院者程國寶之所葺也國寶先公號倚山有嘉
遊之志焉先是以枕雲名亭圖書觴詠于是無何跡與
事遷人琴俱逝國寶葺而大之更榜以先公之號用寄
無窮之思君子謂吉國公有後矣同里唐元乃為之辭

俾工者絃之以相春秋祀事其辭曰

雲蒸蒸而上浮兮公胡為而枕之忽中路而散漫兮弔
千古之餘悲山猶倚於杳冥兮欲親之而愈遠秋月苦
而春飈蕩兮但見孱顏與偃蹇何音容其靡靡兮念年
華之易晚禪嘉名以締思兮願申之以無倦奠桂酒而
椒漿兮延佇乎神之來返後有人其勿替兮撫斯文而
悽惋

湖山雲林圖辭

詹書

彼美人兮顏渥丹蘭為佩兮芙蓉為冠遠別離兮越河
山思一見兮心孔艱山盤盤兮河漫漫舟無以往兮車
無以還託毫素兮寫懷空悵望兮雲間

遠招辭

汪石田

嚮醫予心之好古兮擘先哲以為猷上風牧與臯夔兮
下汎獵乎殷周悟行藏於孔訓兮樂中道而優游何三
閭之激烈兮控忠骨於江流豈狹中以忿怨兮亦矯世
以沽謀固孤誠之莫白兮之死諫而敷尸叶差與玉其

竭愛兮施復禮於生愁苟精氣之尚存兮曠千祀而莫
求或棲神乎列宿兮或寓魄乎山丘庶荒遐之無苦兮
依舊躅以冥遊乃下招曰紘埏之外杳無極忌鴻濛溟
滓魂焉集忌北戶燔燻吳回宅忌回薄西蒙山林奕忌
臬羊楔揄待人以食忌雲噓雨沫中珍薰疾忌漸入寒
門冰雪繹繹忌句萌莠谷疎速千載不值忌龍蛇陸行
紛祝栗忌哀凶萃恙人可及忌皇皇齊州玄所闢忌開
陽閔陰懸運歷忌玉燭孰和百種碩忌墜哇輻湊鱗原

隰忌公侯甲第街衡直忌張筵度入聲几毛虞密忌金奏

既行笙歌襲忌綺肴迭備時欣數忌蟠膏淳母模間去聲

萍實忌觥籌交拜彌永日忌式醉式厭平聲懷古廸忌魂

兮歸來撫故域忌天之蒼蒼其曷為忌鈞庭微極帝何

居忌玉樓十二孰隙辭忌胡生而宰胡死而治平聲忌胡

不祐賢而壽庸罷皮忌知去聲氣上騰奚據奚如忌茫茫

闔闔無所梯墀忌歟入旋去聲風靡散莫持忌南京樂土

踏趾比無虞忌脩門三啓漢夏為池忌縈吳拂蜀乖隔

苗黎忌舟車混會媛彥雲祈忌歲時微合軒蓋交馳忌
畋於七澤萬竈屯圍忌罟網緣山誘射前驅忌獻功息
撩舉肉成坻忌高堂閱坐取足無為忌穉耄相從笑語
墮簷忌投壺握槊廁以彈棋忌娛樂安和化雨露濡忌
思惟舊德佩服不渝忌魂兮歸來顧郢都忌麋羅之墀
淪湘水忌重淵九潘蟠灌湖海叶音許忌下極天垠星辰
地忌中連幽都維軸椅忌包坤括瀆渺茫瀰忌納污儲
怪罔無有音許忌黃能年來顛備顛虛饒螭起忌馬街

冰夷軒九首

叶音使

忌殺人為麻莫可禦忌龍宮貝闕淵

鼉鼓忌蜃樓鮫室幻瓊詭忌殆而一蹶糜軀滅脊忌惟

公墓廟崇江渚忌重庭夾寢承翬羽忌砌城成垣周華

不侈忌靈衣姣

妖

服雜歌舞

叶音尾

忌旗船翼翼颿斯舉

忌魂兮歸來奠茲宇忌東有罔象南獠林必狂忌西踔

夔魘北炷

蒲

翔忌扼腕同聲振莽

莫郎反

蒼忌岐角縮眸

毛鬣曠忌唇如涯丹紫青黃忌搖題閃舌所向同

叶音糖

忌怪孽躩踞變厲諛祥忌氣化而從溺不知晴忌祖頊

宗瑕裔實長忌螽蟄栢盤姻婭宏叶音黃忌聯昭繹景雲

復仍叶而王反忌長才秀士衍餘慶叶音香忌逾江絕漢綿中

邦叶兵王反忌春濡秋履存胷蠻叶平聲忌籩劔圭叶消扶馮叶字通

反披牲克也拴拴叶師莊反忌孺叶朱女反朐叶鞠既體酒玄清叶千羊反忌

儲精合莫求陰陽忌神猶水行祀則通叶地王反忌孝慈交

告尚無窮叶音狂忌魂兮歸來返故宗叶音臧忌亂曰窺藻

繪於騷經兮煥日月其齊光載功言於傳記兮與天地

而悠長既捐軀以垂範兮盍貫道而成章計先生之自

處兮非淺識其能量咨予招之邈遠兮哀世俗之搶攘
辭枝譎以增頌兮心鬱結而永傷

哭學生任本初辭

汪克寬

吾友任本初實齋御史中丞敬子之裔孫也諸父昆仲
往往以才賢得官京師至正癸未之歲其父始命之從
予講學授春秋左傳胡氏傳輒通大義學古近體詩句
法圓熟興趣清遠臨歐陽率更文帖尤得其筆意屢訪
予還谷山中相從於宣之太平無時相舍予編著春秋

纂疏本初與有功比年予戰搶攘本初糾集義兵扞衛
州里遂被禽焉玄默攝提格之春予寓黃山之麓忽聞
其抱疾歿于外舅之居年纔三十有五嗚呼痛哉本初
為人事父母盡孝友愛于弟交朋友以義尤施恩於鄉
黨汲汲濟人之難如其父之用心也從予游者如本初
甚少予嘗為文銘其父之墓去年九月哭其叔父今又
哭本初若之何不為之哀且慟也故為此辭以招之云
予取友於天下兮歷名邦而轍環雖朋從之彌衆兮胡

達才之良難得任子于海寧兮實穎異而可愛曷苗秀
而弗實兮使子悲慟而心痠予哀任子之不壽而歿也
爰命巫陽招而復之巫陽拜手亟招之以辭辭曰任子
神遊胡不歸來些天地茫茫子奚如此些魂兮來歸爾父
勤勞保宗祐些扶顛植仆君子澤些金篦篤教遺戒昭
焯些魂乎來歸繼承乃志惟子是託些魂乎來歸爾母
鞠育恩孔深些思子皇皇髮不盈簪些魂乎來歸不可
久哀以損其心些魂乎來歸難凡難弟如足如手些爾

弟子立孰與左右些魂乎來歸思凡之悲不可以久些
魂乎來歸爾子三齡泣呱呱些骨重神清識之無些騏
驥之駒丹鳳雛些魂乎來歸疇昔相從不違頃刻些祈
川汪淝黃山峩我屢涉歷些晨牕夕燈幾請益些問難
勤渠不可復得些魂乎來歸客歲城府往來追隨些少
陵一編精研細玩悵悵論詩些孰知永訣我心傷悲些
魂乎來歸蠲我憂思些魂乎來歸南溪之麋喬木蒼鬱
些秋風蕭颯白雲出些魂乎來歸世故紛拏憂患誰恤

些魂乎來歸大塊無垠一遂廬些日月流邁運太虛些
本性湛然明有餘些魂乎來歸返故居些亂曰富川滔
滔兮不舍晨曛岸芷郁郁兮汀蘭有芬魂不可招兮霑
予巾巫陽載歌兮籲于蒼昊

七哀辭

汪叡

古人之詠七哀者蓋感而發其可哀有是七者之目至
杜子美八哀詩則一篇為一人作是則七哀者其哀在
已而八哀者其哀在人也仲魯竊哀平日交遊取益為

師若友者其守節服義無所屈撓凡七人焉其間如汪尚書澤民余左丞闕鄭待制玉陳狀元祖仁皆名著史傳其未見載錄者程禮部文王進士詵朱縣尹倬三人爾感而哀悼前後歲月不同茲錄為一卷以便觀覽序紀其實辭達乎情情義所存風教所繫也哉

汪尚書

至正十六年乙未八月丁丑長鎗畔將索諾木巴勒陷宣城前嘉議大夫禮部尚書汪公死之或謂公告老閭居為

日已久可以無死嗚呼是豈知公者哉忠誠之存靡間
今昔不死則辱在在皆是况宣之城守得完數歲無虞
者臬司守將惟公是咨迨城陷而公執義就死是邪非
邪項見老成數輩與公同升于朝名望夙著一旦臨患
難隱忍幸生俯伏周旋勲名委地莫顧人指笑則公之
死是邪非邪仲魯與公同出唐兵馬使都虞候公嘗歸
婺源率宗族祭掃武口大田先塋過鄉里不以仲魯貧
窶而外焉茲已二十有餘歲公之行義卓卓載史冊惟

公之死關乎世教不可以無言也遂為之辭以哀之其
辭曰

天幽幽以杳默兮日黯澹而無輝海氛騰而鮪蜃舞兮
河橫潰而瀾馳悲夫人有生兮委草木而同隳孰篤信
而秉義兮偉英傑之猷為惟松柏之孤直兮蹂羣芳匪
異姿雪霜慘而交隆兮色貞毅而靡虧嗟哉夫子兮夫
豈異茲間居日已久兮忠蓋猶一日也民皆吾君赤子
兮城闈亦君之廬室也憂君之憂日靡忘兮天穆穆猶

咫尺邦民惟吾視瞻兮吾舍是而安適城之存吾與存
兮城既隳吾將焉匿死義以酬君兮殺身以成仁中庭
危坐兮曷有其身罵賊聲不絕兮惟志之伸嗚呼哀哉
揭日月以為明兮昭天地之常經彼偷生以全軀兮類
禽犢之冥冥蒙羞被耻不顧慮兮反議先生以不必死
世豈昧夫公論兮錫文節之嘉謚敬亭兮清秋雙溪水
兮夾鏡流惟先生之高風兮邈山川之悠悠些吾文以
敬弔兮日西墜而雲愁

余左丞

武威余忠宣公名闕字廷心曩以色目第一人登第內
任翰林太常外官州郡省憲文章政事昭昭在人耳目
退處金斗之青陽讀書一旦被命為左丞守安慶方危
急之秋即日就道撫其疲民羸卒百戰抗賊誓與城存
亡凡幾越歲終以節義昭史冊其傳即今翰林宋濂所
撰昔公僉憲浙東時見仲魯送戴琥教諭三詩數見問
故待制鄭玉還自金華俾仲魯往見之殊蒙許與且言

易之一經嘗求得古書考索積思有年遂得見易中一字一句盡出河圖洛書自秦漢以來人未之見今幸偶得之方將注述成書以貽後世然未敢輕也仲魯再三舉一二疑難叩問但言子且用工此經五七年後相見當以吾之所得者相告非有隱也子必用工日久而我之所見者端確然後可以面商訂爾不二三年而兵革動海內不相聞壬寅春上同安詢知有王無霸者專為公騰錄所注易書因求王生詢之無一字存亦不能識

其一語向嘗見公答鄭待制及與江西友人書其語與
昔之言無異旨痛哉故率諸友生理其塋墓而致祭焉
復為辭以哀之其辭曰

大江西來兮波千里而東馳皖山峻極兮鏡雲漢之巍
巍嗟夫子之貞烈兮揭日月與爭輝岌岌同安孤城兮
抗巨賊越歲年兵食絕而援寡兮民之死而靡遷唐睢
陽之張許兮論孰為之後先昔公之志于學兮夙忠貞
以自許大魁先其匪議兮非古人吾誰與政事隨以昭

兮辭翰恒譽處易深探乎化原兮妙達乎象辭之根謂
經之字字句句兮或出乎河洛圖書之文自秦漢以迄
今兮人莫之見而獨吾有聞惜述注之良苦兮泯焉未
有傳也豈天之喪斯文兮抑神之秘而弗吾宣也悵金
華之涼宵兮那忘乎懇款之言也遡江流而西上兮羌
徘徊乎古舒弔遺蹤而詢故老兮酣百戰於城隅拭殘
碑而灑涕兮大節堂之渠渠城之南峩塚兮羞芹藻而
薦芳風蕭蕭而蓬偃兮目黯澹而無光跪斂衽而載奠

兮慨今昔而靡忘

鄭待制

師山鄭先生名玉字子美隱居講學善為古文或以黃犢駕小車人或笑之識者奇之嘗構精舍于里之師山其堂曰三樂踞岡為軒曰極高明集諸朋游討論春秋筆削之旨為之註釋曰春秋闕疑至正甲午朝廷用大臣薦遣使以翰林待制召先生起而拜命束書就道道中疾作遂還山適大軍駐吾新安遭謗捕入郡不屈而

死卒以節義顯名列史傳仲魯辱知愛者每過山下仰
睇羣峯遺趾如昔草樹淒迷豈勝悲慨抽辭哀些敬酌
一觴其辭曰

溯練溪之寒瀨兮睇師山之崇崇仰三樂堂之遺址兮
森莽莽之荒叢念昔松篁茂鬱兮真堂構之方新友朋
紛其來集兮濟冠佩之如雲繫先生之剛直兮懼師道
之莫立也申義利之辨兮謂聖賢可企而及也春秋述
而闕疑兮易經傳而有成鈞岑山之深峻兮牧西疇而

偶耕方遊息而玩樂兮適四海之寔驚詔脩降於九重兮
徵待制于翰林宜弭亂之有策兮闡治教於來今曷半
途而遽疾兮返乎吾故鄉豈終不能以有達兮孰若遂
初心之遁藏慨浮雲之萬變兮亶不可測也名匪為身
累兮義之歸乃吾責也情沉鬱而靡申兮蔽而莫之白
也從容就死兮吾心安而理得也吁嗟先生既往兮節
義昭猶日星名存史冊而不亡兮粵千古而彌馨徘徊
茲山兮採草木之羣榮酌清觴而灑涕兮惻林鳥之悲

鳴

陳狀元

浚儀陳狀元名祖仁字子山壬午科以漢南第一人登
第廷對策忠厚懇切天下傳誦謂有漢意由翰林編修
遷太常博士以憂還京口辛卯春來新安以葛元哲高
則誠二進士書邀趙汸子常與仲魯偕遊黃山孜孜講
學不少輟論詩法甚詳別後數書相規勉期望殊切且
言天下將多事惟紹興風俗淳厚新朱易得約同遷于

是以待天下寧晏更以兵阻不相聞近觀史傳方知其
在朝奏議折奸扶危忠君愛國辭氣端確昭如日星終
死于義是故追悼之以辭其辭曰

瞻黃山之崑峯兮三十六之奇峯念昔陳子山兮來躡
仙子之遐蹤招予與同遊兮駕天風而戾止朝浴乎丹
砂之泉兮夕攬乎玉蓮之芳藥凌天都之峻絕兮以周
觀乎八紘慨生民之庶富兮化殆漸乎四溟何風濤之
蹴天兮乃予違而遊乎蓬島羣仙躑夫燕逸兮至於君

豈同造舟顛覆而將伯助兮終莫救其摧隳大厦勢已
傾壞兮夫豈一木之能支九廟棄弗顧兮輿翠鈿以自
隨君徬徨將安適兮當奉主而北馳成敗詎能計兮矢
吾心而靡渝恭執事兮登載車排國門而出兮死生與
俱竟殺身兮委骨丘墟皇天鑒厥精誠兮魂昭陟乎帝
之居曾日月之幾何兮丹青著其名譽披史傳而長太
息兮悼往昔之無已軒轅峯猶萬仞兮倚寒空而遙峙
哀見君而不再得兮颯秋風之夕起

程禮部

前禮部員外郎程公名文字以文號黔南生吾邑人也
孝友純至獎勵後進不倦蚤遊燕文章行義為諸閣老
所推許然安分恬退不務進取中歲始為郡博士任懷
慶滿考來京師適賀相當國人有薦公於賀者乃求公
文余廷心貢秦甫就公索之堅拒不與二人者索之朋
友得數篇以進賀相焚香拱讀稱歎不已遂有翰林編
修之命選除御史轉任禮部賫賞天台方氏還寓會稽

之錢清僧舍道阻不克歸一日張氏遣使迨紹興路官以厚禮來饋公堅卧不顧既而兵四集乃往抗主貢泰甫晨謁丞相達實特穆爾還卧疾張氏之為平章者就謁公擁衾面内卧不回視遂移卧西山僧寺一日疾果篤召泰甫而諭之曰吾以死累子埋我茲土勿為塚可也泰甫為主其喪葬後大軍至墓皆被發惟公墓所以不塚免丁未夏仲魯與邑人汪炯之杭往西山求公墓弗得還西湖書院求所刊文集讀之不勝悲慟遂哀之

以辭其辭曰

萃材兮棟梁美輪奐兮廟堂翬飛采絢兮跋翼而鸞翔
公之文擅一代兮諸閣老誰與頡頏進不競榮寵兮退
焉與心修藏賀相喜文由我知兮劃乃徵吾文章豈溝
中之斷棄兮尚可取而青黃郡博士嗟久淹兮一旦致
身乎玉堂我豸冠兮驄馬行桓桓官禮部兮仰依日之
清光倏航海而南兮老將旋予之故鄉天台險絕兮留
會稽而徜徉病少駐乎錢清兮張胡為乎承筐有將卧

不面顧兮厲貞節吾何敢忘兵革四集兮遁西山其孔
良輿疾遄往兮吾願瘞骨乎此阮貢公素相友善兮託
之歛以襄悠悠天地兮吾終焉其允臧嗚呼陟吳山兮
遊鳳凰江山如昔兮蘇堤夕陽求先生之墓而敬弔兮
萋露草之荒荒反湖西而容與兮披雄文于類庠奉讀
而長太息兮浩海濤而飛霜

王進士

王進士名詵字伯恂吾婺源之範溪人宋奉使曷之裔

也才思俊逸人夙推服甲申領江浙鄉薦丁內艱戊子
春試春官擬置魁選或以帝車賦黜之既而自悔其誤
交相咎責訪問謝過薦為翰林編修辭以親老而歸壬
辰春斬黃寇陷饒徽癸巳夏舉義設策應官兵以復郡
邑退則講學于鄉里乙未冬寇復至乃應樞密院判哈
瑪爾之招往德興見之還喻巨室胡伯振從義寇覺之臨
難不屈死之伯振亦遇害嗚呼如伯恂之俊發超邁人
固罕及而終死于義其可泯邪仲魯既不揆而銘其墓

復為辭以哀之其辭曰

冰潔兮日輝古鑑懸兮絕纖翳才華天造兮人力曷施
清波芙蓉兮匪雕飾乎聲詩文不加點兮夫豈讓乎衡
為才美信若是兮行義虧又何貴學與文尚有逮兮孰
如先生之死義雪慘裂兮草枯而風厲原隰求而斂殯
兮有同宗之諸季堂封深固兮樹森鬱乎阮辜汜湛露
而重省兮悽猿鳥之悲號空山木葉兮聲蕭騷靈爽英
發兮悽愴薰蒿墓銘有碑兮將鐫置乎巖坳徘徊而不

能去兮我心忉忉日荒荒而雲暝暝兮激松風之怒濤

朱縣尹

遂安縣尹朱倬字孟章歲辛巳領江西鄉薦登壬午第
授某州同知以憂家居服闋授文林郎遂安縣尹庚寅
同考江浙鄉試既出院會于椽郎萬元哲之坐因詢仲
魯詩經無封靡于爾邦義作如何破題答曰已在孫山
之外夫復何言元哲云此友非特詩義高賦尤高一破
自當首薦因謂之曰崇德報功之典賞延於後世修道

全德之化法本乎前王詠歎之至者感慨之深也孟章愕然曰此篇已錄全文在卷中諸公同擬作本經魁竟尋賦策未見移文謄錄彌封所亦對字號不同誰不惜之且索角端賦元哲曾錄之出與之觀三復擊節稱歎元哲又曰此公志存乎古人之學得失不掛諸念由是孟章相與游情義甚至且與季廉諸公皆來相見因約來春過遂安明年春仲魯往留一月嘗自歎曰倬登科十年未霑寸祿其命也夫仲魯應曰不患無位患所以

立故君子行己立身惟安義命不以外至者動其心也
孟章殊服此言壬辰秋寇由開化趨遂安吏卒逃散孟
章大書于坐曰生為大元臣死為大元鬼禍患從天來
不死復何以乃坐公所以待盡寇以邑虛無人而焚之
火逮解舍乃赴水死後竟無傳其事者可哀也哉追悼
以辭其辭曰

疾風兮草萎勁節兮靡移繫遂安之賢尹兮厲貞操其
匪虧邑小而荒僻兮氓其蚩蚩令初下車兮即興學而

誦詩夙夜孔勤兮化洽而民熙一朝寇忽臨兮靡兵備
其孰禦民駭而卒逃兮誰與獨處寇豕突茲邑墟兮劃
烟燼其棟宇予執死不二兮天明明其吾與夙披簡冊
兮矢致身乎忠良况瓊林之燕集兮堯舜君民之有望
憶武林之嘉會兮豈徒事彼文章行與義之有在兮憲
聖謨之洋洋歲忽忽其已遠兮心耿耿其莫忘川悠悠
而波逝兮山靄靄而雲曠思賢令之不可見兮長向風
而哀傷諒姱節之不可渝兮發斯文之耿光亂曰學端

以粹質之純兮顯擢甲科名譽臻兮十年未祿奚命之
屯兮牛刀小試弦歌陳兮變故莫測奚銜我民兮之死
靡忒惟志之伸兮是謂殺身以成仁兮

故元帥朱侯哀辭

并序

吳舜舉

朱侯名文選字克用饒州鄱陽人幼惆儻讀書有大節
尚氣義有古人風至元間以龍潛舊知授忠顯校尉唐
州翼上千戶戍新安壬辰兵興屢著功績乙未冬蘄黃
寇再據徽城公夜率步卒數百踰城縱擊寇夜遁行省

承制授浙東宣慰副元帥提兵往來杭越間庚子秋與
胡愈院偏師遇于諸暨兵敗被擒械送金陵遜辭免禍
將以有為也久之監者弛其防遂以辛丑四月微服自
樂家沙募舟走江浙省臣耆老優假公俾攝本省財賦
府事未幾張士誠逐臺省大官有不臣之節公亟由海
道入覲且言藩臣跋扈將帥持祿保身東南所以未寧
之故維時權姦擅朝紀綱日紊公有言不施每見人輒
喑鳴流涕丙午冬江浙賈降丁未陷平江而大勢駸駸

向乎燕趙矣會朝議將棄城北遁公曰一木支大厦隻
手障黃河非吾力所及吾忍死至今日尚非其所邪即
抗疏止北狩之議不省乃號哭自刎於闕門嗟夫以數
萬里天下之廣百餘年社稷之久平時食重祿居高位
者不知其幾人一旦有急不能為國家發一矢至偷生
賣國之事率恬然為之何則廉耻道喪風化不明無怪
乎禍之至此而不可收拾也至於儒生小校乃能出萬
死一生脫虎口蹈鯨波竭忠誠礪名節死而後已其視

晉之嵇紹唐之權舉濟殆軼而遠過之豈不偉哉予少
從諸生游鄉校退必見公于寓舍見必孜孜勉勸以學
問為先今窮老無成思公誨語寧可復得故特序其梗
槩如此俟他日秉史筆者或有取焉并為之辭以寫予
哀其辭云

繫大鈞之陶播兮靈萬物其為人非忠孝之屹立兮與
草木以同湮偉夫子之起家兮負卓犖之奇節居一命
之微祿兮長千夫於下邑易詩書以介胄兮釋儒服而

戎行待風塵之四起兮思有志於修禳何勞勩之遺棄
兮或賄賂而超遷羌負乘之無狀兮又安能撲於燎原
惟臣心若水兮縱萬折而東注始喪師於越兮卒竄身
於江渚強藩跋扈以擅命兮謂臣謀之非良豈居安暇
食之不欲兮吾懼夫昧逆順之綱常趣海道以見君兮
吐孤忠其歷歷國魚爛以絲棼兮豈微命之猶昔長戈
指于京闈兮大駕狩于龍荒叩丹墀以灑血兮願媿節
於嵇郎嗟世道之日降兮視君親而遺後既就死以得

所兮孰若偷生而顏厚使肉食而有是心兮何攘穀之
能為燕山縈迴以抱憤兮易水嗚咽而流澌少辱公之
獎激兮今負公之期待聞公著此姱節兮隔萬里而嗟
慨上以痛邦國之覆敗兮下以悼賢哲之不遭矢予衷
以寫哀兮平陽已矣其誰招

新安文獻志卷四十九

欽定四庫全書

新安文獻志卷五十

明 程敏政 撰

詩四言

酬寺簿勸農追和淵明見貽 羅 願

江漢之會中具五民見異而遷乃喪厥真相彼樊山我
行所因有閔其攘間彼居人方時清明家自為援其數
其浸其動其植孰為使民有田不穡亦惟蒲魚恃此鮮
食歲運周回景躔西陸帝籍重開天顏逾穆耕事將起

毋荒遊逐凡我農官戒民宜宿戒民伊何美成在久譬
彼射侯則求其耦驅率慵惰轉緣南畝數耘疾收在而
心手農亦有書匪藏金匱盍耕如莘盍飴如冀桑蔭清
好濁醪日至已勤而食則無所愧勿謂此州遠連邊鄙
我疆西北盡其四履風雨順時日星循軌屢豐作頌以
致歸美

北憲伊吾

趙幾

北憲伊吾輯古也北憲人讀之其聲伊吾故名之曰北

憲伊吾

伊吾維吾推魯株愚友資其深片雪洪鑪 伊吾維吾
甕牖繩樞爰升其華秋月冰壺 伊吾維吾緝柳編蒲
爰席其珍尺璧珊瑚 伊吾維吾朝饘暮餬爰舖其腍
醴醕醍醐 伊吾維吾何以為娛爰心其聲鍾磬笙竽
北窗伊吾吾誰與俱融融沂風懷哉舞雩

上李侯

汪炎昶

歎不宜蠶絲賦折估其來已久蝗至之夏或以土產欺

省下徵絲令民駭懼不知所為侯晨夜兼馳力還其舊
民德侯甚皆言自始附版圖逮今未見牧守愛民有如
此者謹掇民謠為歌四言一篇以獻其辭曰

貢以土作法奠于禹篚纊與絲青充暨豫制有常經無
斯焉取世降土覺德不遠柔或九州賦萃于一州貿無
為有薄人于尤維皇啓運蠲我疾苦視青充豫不物而
估上便下安踵以為故虺蜮肆欺矇人矚已幾創繭絲
塗我赤子我侯曰嘻害無我始蘊隆揮汗義動省闈萬

鈞回幹民以恬熙匪人實難孰心疲羸維此陋邦桑柘
田瘠苟重以此其何能息自今寸縷皆服侯德弭蝗固
德今茲之康此而非侯篚貢是常吏因以蝗厥禍彌長

久雨

方回

云胡不出積雨予尼意彌八紘膝此一席誰具烝徒假
予楫航一往滄海觀彼茫洋掩闕晝眠胡寧不暇魯叟
攸戒敢視為夜寂寂踈簾幽幽空階鳥下碎蘚傷予之
懷悠悠古道溢溢行潦豈無岑樓送目遥草心之憂矣

莫或予知彼其之子謂予寒饑

陳定宇批
云陶體

題林泉風月亭

程漢

林泉風月亭宋中書舍人程公棲幽所也魯孫伯順能嗣而葺之故作是詩以美焉

鬱彼中林九九如櫛有李有梅爰採其實翩彼鳴鳩其羽詵詵冽彼寒泉其流泠泠爰濯我纓容止載寧潛魚在蒲或闖于萍有風自南維谷之深嘉客戾止載弄我琴風之薰矣琴調惜惜有月在東照我良夜嘉客萃止

酌醴于羊明明俎豆式宴且暇于亭于沼弗壞弗湮有
華有棖舊貫之新詒謀式好思古之人古之人兮實為
經始靡不心基孰紹厥美嗣服斯賢助哉孫子

釋奠樂章

詹書

迎神奏咸和之曲

大哉先聖道德尊崇維持王化斯民是宗典祀有常精
純竝隆神其來格於昭聖容

奠帛奏寧和之曲

金少四卷之三
卷五十一
自生民來誰底其盛惟王神明度越前聖深帛具盛禮
容斯稱黍稷非馨惟神之聽

初獻奏安和之曲

大哉聖師實天生德作樂以崇時祀無斃清酤惟馨嘉
牲孔碩薦羞神明庶幾昭格

亞獻終獻奏景和之曲

百王宗師生民物軌瞻之洋洋神其宅止酌彼金罍維
清且旨登獻惟三於戲成禮

徹饌奏成和之曲

犧象在前豆登在列以饗以薦既芬既潔禮成樂備人
和神悅祭則受福率遵無越

送神復奏成和之曲

有嚴學宮四方來崇恪恭祀事威儀雖離雖歆茲惟馨神
馭還復明禋斯畢咸膺百福

祀事

舒頌

祀事國家崇敬也山川社稷風雷肇置壇壝齋庭庖滷

列以位次春秋祭拜所以重其事也

嚴我祀事牲醪潔馨升降揖拜于川后山靈壇壝肇置
有齋有庭 惟后稷氏播種百穀食我活我壇而不屋
萬世永賴民生是育 曰風曰雷曰雨曰暘弗忒于時
嘉穀穰穰乃積乃倉惟邦家之祥 冠服整肅沐浴外
宿昧爽禮行弗諂弗瀆幣實于篚鞠躬致告 伐鼓彭
彭撞鍾鈞鈞神人以和鼓瑟吹笙法古用今惟我大明
送黃子運自石門遷館琳溪程子儀氏

陳天迪

東巖之山其泉涓涓彼姝者子其聞則賢坎止流行束書
來遷溪月為燈窻風入絃東巖之樹其葉泥泥維主與
賓如兄如弟相知以心相接以禮曾是勿留以敦宿契
東巖之石輪囷屈盤古道責人今時所難移風易俗庠塾
之間持身以嚴敷教則寬乾坤爽氣西山之阿上摩玄
霄下臨清河秋林欲丹春酒微波攜爾朋儔倡予好歌

樂府歌行

長門怨

吳少微

月出暎層城孤圓上太清
君王春夢歇枕席涼風生
怨咽不能寢踟躕步前楹
空階白露色百草寒蟲鳴
念昔

金房裏猶嫌玉坐輕如何驕所誤長夜泣恩情

見郭茂倩樂府

詩集

古鏡行

汪藻

我有辟邪鏡得之咸陽宮
其陰為天地一母將九龍
旁書負圖字土蝕如蠶蟲
緘以駭難珍妙極倕之工
請言

照遠近十里秋毫空豈不鑒脂澤所貴肝膽通問誰為
此器太古非人功客聞重歎息意欲窺靈蹤高臺不辭
倚恐客難稱容繩窮匣半啓四室來悲風日車當晝留
羞澁如頑銅森然髮上指凜若臨霜鋒我還撫客手此
豈世寶同揮淚兩無言掩鏡匣囊中

桃源行

汪藻

祖龍門外神傳壁方士猶言仙可得東行欲與羨門親
咫尺蓬萊滄海隔那知平地有青春只屬尋常避世人

關中日月空萬古花下山川長一身中原別後無消息
聞說邊塵因感昔誰教晉鼎判東西却愧秦城限南北
人間萬事總堪憐此地當時亦偶然何事區區漢天子

種桃辛苦望長年

黃氏東發曰桃源行似亦因當時求仙而作

有美一人

程俱

有美一人在昭君藕絲為衣蘭作裙君初顧言淑且真
直欲載以黃金輪人心變化如浮雲明粧覺暗笑作顰
何當還之承華茵令君宴寢凝清芬

有美一人在煙汀朱顏朝滌玉壺冰素手暮理朱絲繩
語言窈窕丹鳳鳴坐持紈扇睇秋螢何當還之翡翠屏
為君把鏡整襟纓

有美一人在南浦月明採珠光照渚瑤衣被體金索縷
獨抱幽寒泣煙雨何當置之白玉宇為君陽春歌激楚

本注云時鄒志完在昭州曾
子開在汀州陳瑩中在合浦

遊仙辭

程俱

騎龍上天入太清繼世而往在我盈握鈴而呼大司命

主非使者走折脛乃知神仙非智巧積功累行如邵鎬
專懷邪辟祈長年誰言淮南雞犬飛上天

安期生赤玉鳥遺之東海濱千年求我蓬萊下祖龍豈
是千年人安期一量鳥葱嶺一隻履茫茫九州在泥滓
至人去之如脫屣吁嗟祖龍蕭翁寧悟此

鯉魚腹中有隱符白魚腹中有素書鞭靈走石繞一戲
騎麟上天亦徒爾誰能解衣泳水中使人呼指赤鱗公

捕虎行

汪襄

西山春暮繁草木紅白花開暎巖谷朝來猛虎忽留蹤
獵人挾刃爭軀逐坡平草軟筋力健目光兩鏡照林麓
吻牙狐兔何足噬要向川原飽人肉獵夫鼓勇欲生擒
失利寧虞傷手足我令壯士八九輩袒裼而往敢退縮
持戈踴躍皆直前不顧爪牙加觚觸於菟怒鬪力已困
白刃紛然刺其復不施陷穽設羅網須臾俄聞就縛束
未踰半晝捷書來撫掌驚嗟大神速百夫肩舁向城市
塞巷填街爭縱目皆云古昔未曾有不比春山得麋鹿

斑皮愛護輸郡府肝膽珍奇競收蓄吾聞獸之猛者莫
如虎搖尾磨牙肆其毒一旦力盡勢已窮血骨反以餉
僮僕乃知剛很不足恃仁若騶虞才可錄虎兮虎兮曷
為出哉深山窮谷可以隱而不隱豈以夫皮為之災官
有壯士長戟可以捕取爾爾其亟去無復來大江雖深
亦可渡縱橫勿礙行人路

飲馬長城窟

王炎

春風塞草青城頭烽火靜秋風塞草黃城下角弓勁秦

人備匈奴築城勞我師城成有虧日邊釁無已時哀笳
中夜起戰馬豎雙耳蒼茫沙上月幽咽隴頭水征人悲
故鄉閨人守空房安得霍嫖姚飲馬瀚海旁

二禽

方岳

鵲噪令公喜鴉鳴令公怒福兮挽不來禍兮推不去咄
哉之二禽於爾竟何與茅簷新雨晴鵲聲弄圓喙主人
顏色歡甘諛終不悟禍常十八九鴉或告之故城頭尾
畢逋唾者滿行路佞鵲不我忤忠鴉不我誤試嘗問主

金匱要略卷五十一
卷五十一
人無乃乖好惡嗚呼平生所聞唐太宗切齒不平田舍
翁昨朝墳上土花墜斷碑零落悲秋風

田家樂

方岳

前村後村場圃登東家西家機杼鳴神祠飲福阿翁醉
包裏餘胙分杯羹婦子迎門笑相謂總說今年好年歲
牛羊下來翁且眠時平無人夜催稅

東西船

方岳

昨日東船使風下突過前舟快於馬今日西船使風上

適從何來急於浪東船下時西者怨西船上時東者羨
篙師勞苦自相覺明日那知風不轉推篷一笑奚爾為
怨遲羨速無休時沙頭漠漠杏花雨依舊年時橋燕語

排門夫

方岳

一家一夫排門起五家一甲單出里夫須襍襖潦霧愁
與官輸木供邊壘沙場青草時運衰軍書抵急飛塵埃
官須排杖二十萬巖邑配以三千枚黠貪分頭授掌唾
田里寧容高枕卧望青徑指三尺墳踏白邊為萬金貨

殘爾家爾勿嗟行取金錢寧爾邪小人所憂在一飯政
坐爾家殘吾家待吾舉火者百指母已瘡病兒垂髻社
家浸種亦已芽秧田未翻生薺花吏呼勸農今幾日典
衣已供塘塢冊九年回首柰若何夢繞江南與江北

樂府二首

方虛谷曰式賢詩有驚人語
如樂府諸篇尤予所深喜者

吳龍翰

妾心江岸石千古無變更郎心江上水倏忽風波生
製衣寄夫婿妾有冰雪段中間連理枝不忍剪交斷

鴻門舞劍歌

汪宗臣

黑雲壓壘騅嘶風荆軻聶政粗豪同舞筵閃動青蛇影
焉知火帝生真龍一劍剡剡匹夫勇一劍翼翼隨西東
壯士長戈氣貫虹掃開靈暄曦光融尊前張膽不為屈
生屍鬻割吞羣兇子房笑語指顧頃奚啻脫車深淖中
平陽帝譜炎精動玉蜿蜒夜當其鋒秦關怵服湯武出
赤幟彌張天下雄金刀赫靈漢劍奮烏江落日楚劍空
美人沒草雕沒水項莊何處鳴秋蛩

明妃引

孫嵩

明妃如花顏高出漢宮右可憐君王目但寄丹青手寂
寂保孤妍悠悠成偽醜坐此嫁穹廬流落無時回無時
回琵琶未闕邊笳催哀絃流入千家譜明妃只作關支
舞年年猶借南來風吹得青青一抔土君不見漢家嫁
得幾娉婷不聞一一琵琶聲禍起當年婁敬謬後人獨
恨毛延壽

曲江頭

孫嵩

君不見曲江頭離離衰草寒雲秋今人不見昔人遊昔
人不見今人愁欲談往事無耆舊沉吟千載空搔首盛
衰倚伏如寒暄秦時宜春苑漢世樂遊園更復唐人宮
殿擁千門往古來今但如此同一溶溶曲江水

公無渡河

孫嵩

公乎渡河不可航年既老智則童臨流徑渡何悵悵夫
豈有急須自亡前無掣後無擠且無跡捕至爾門未至
東市之誅磔死如牛羊河流在前白日光誰以錦覆河

流黃公不見河源天矯落崑崙懸天注地千里強飛奔
突入中原疆一擊無有完隄防跳蹴后土春穹蒼公惜
視之行康莊掉臂而往無褰裳不能馭風騎氣奚為狂
河之流湯湯鯤鯨之惡未可量長戈為鱗鋸為尾刀崖
斧窟鏡牙張公其以身委饑腸人生無難死足傷以饑
寒死骨猶藏棺槨送爾松柏岡何必為河之鬼馮夷鄉
其下濁泥出無梁何不相蹙公自僵奈何乎瑩篔之音
河水旁

德驥篇

孫巖

西家白馬如曳練東家赤馬如驅電時時竝轡刷長鞅
羞殺分飛伯勞燕白馬不防牛有角慘甚兵間中矛稍
不出能令赤馬疑隔巷來奔初不約躊躇血地嘶鳴哀
悲風颯颯驚條枚皦然德驥非凡材牧人驅迫去復回
物於儔匹且如此何況世間貞信士管仲敗餘勤鮑叔
孝章厄極悲文舉茂弘將坐白其忠叔翰當收脫之死
乞兵欲赴雍丘危突圍竟雪都昌耻雖云志計有伸屈

至今撓弱聞風起利蓄樂禍無故情東家無恙汝得乘

築城謠

方回

從軍去築城不如困長征從軍去掘塹不如鏖血戰古
今征戰立奇功貂蟬多出兜鍪中徒教力盡鍤與杵主
將策勲士卒苦君不見每調一軍役百室一日十人戕
六七草間鬪饑餉螻蟻主將言逃不言死

種稗歎

方回

農田插秧綠時稻中有稗人未知稻苗欲秀稗先出

拔稗飼牛惟恐遲今年浙西田沒水却向浙東糶稗子
一斗稗子價幾何已值去年三斗米天災使然贗勝真
焉得世間無稗人

桃源行

元序云子謂避秦之士非秦人也乃楚人痛其君國之亡不忍以其身為讐人

役力未足以誅秦故去而隱於山中爾至晉而後漁者見其子孫或誇訛以為神仙固已非矣王介甫知有父子無君臣之句尤為悖理楚雖三戶亡秦必楚不遽亡之則亦避之蓋深於知君臣之義者介甫殆未知也淵明豈輕於作此記亦私痛晉之士大夫翻然事劉裕而無耻者爾子遍讀桃源題詠數百首無能發明此意故大書道士壁而刊之不知其借兼是時北兵破

蜀降將或為之用因并以寓一時之感而其
實亦足以為天下後世為人臣者之勸云

方回

佩蘭騷人葬魚腹章華臺傾走麋鹿祖龍南遊萬事非
腸斷沅江為誰綠王孫公子入函關半作長城鬼不還
委質良難身死易長歌深入桃花山姬周以義興夷齊
用為耻懷王歿於欺此恨痛入髓力不加虎狼固有去
之爾向來長往人素心政如此俗人不識呼為仙謂無
君臣益欺天慷慨褰裳睨東海不見當年魯仲連淵明

胡為作此記不紀義熙同一意蓋殺人間淺丈夫反君
事讐如犬彘我來山中覓餘春千古義氣猶如新楚人
安肯為秦臣縱未亡秦亦避秦

老馬行

方回

十年何啻騎千馬望風此馬甘為下老夫與尔共艱難
是非苟且相逢者憶昔專城鬢欲霜宇宙茫茫成戰場
指呼壯士斬羣賊蹀躞濺血霑鞞裳廡中始與駑駘列
夜夜向風嘶曉月咆哮跳躑不受鞍獨我乘之心妥帖

韓幹曹霸圖畫同耳小骨高蹄踏鐵吳隄朝嘶淮上水
薊州暮蹴燕山雪黃雲衰草出長城碧眼虬髯逢者驚
百人疾趨俱喘汗力追不及猶緩行痛飲爛醉仍宵征
了無側仄肩輿平髮禿齒危兩衰暮重到江南如隔生
我閒解官甘寂寞爾病良醫頻灌烙去去西湖往探梅
雅稱是翁俱矍鑠陌上誰家年少郎千金美妾規紫光
謹管芻粟尚努力永伴殘年田子方

漁父辭

程文海

漁翁牽纜漁婦紡膝上兒看掉車響溪南溪北趁冬晴
水急船多欠設網祝兒休啼手正忙網成得魚如汝長

荷花辭

葉朱

未花葉自香既花香更別雨過吹細風獨立池上月

弘曹

齊云此詩
故是幽遠

古築城曲二解

葉朱

長城三十萬人夫版築罷勞骨已枯萬里嘗憂絕地脉
丁夫命絕亦知無

城周萬里勢差我董役功成奈虜何還是管城為計巧
至今文字策勲多

白燕篇

唐元

炎曦爍晴宇澹蕩池光虛澁澁復差差上下池之隅獨
稟西昊氣而為三春雛烏衣改故號素質明且都豈非
衆黑中能以白自殊珍禽効嘉瑞適與昌運符犂牛產
駢角宗廟之所須凡馬偶天驥子流汗血珠願君振高
翮慎勿趨平蕪遠隨鵠摩霄不作雉惟宰韓公羨二鳥

鍛羽嗟囚拘何如息危機保此冰雪膚

踏車行

唐元

吳天不雨日光赭枯槁遞響遍原野
祗消三日雨滂沱水雲萬頃搖新禾
君不見前年苦雨圩塍破敗屋斜穿
小舟過至今怕聽雨聲長點點滴滴
剗人腸街頭二千得斗米紅粧洗米
官河水不愁圩破雨翻多奈此白粲
珠璣何

青玉壇歌

乃魏夫人
得道處

胡初翁

嶽雲滿地綠花曉古竇閱春琪樹小仙壇傳者魏夫人
雄飈駕海騎朱鳥海波燒日鰲足紅三山飛權愁天公
帝嘉神績莫南服勅龍先後頒瑤宮壇前月鋪六月雪
明鏡芙蓉凍不折丹經深鑠山中天玉鸞啼走三湘煙

春寒謠

胡初翁

江南鳴寒風破碎江浪傾奔上沙背虛舫眺遠不見春
蘆芽欲殲柳痕退黃帽剪紙拜孟婆槁竿插堤避蛟鼉
客愁萬斛倘無酒如此千里長沙何

蠶婦辭

洪焱相

貧家桑地狹買葉療蠶饑葉價貴如金賣釵仍典衣所
得弗償費况乃筋力疲蕭條鏡中顏伊軋窻下機都將
寸心苦織入千萬絲帛成不敢裁支梧迫公私端居被
文繡愧爾西家施

吳姬十四五

程文

吳姬十四五蕩漾採蓮船羅衣耀鳴璫自好還自憐貞
心抱冰雪皓齒明貝編臨風歌一曲和者皆靡然誰當

聘良媒白首同所天投以玉鏡臺報之金臂纏

君馬黃

程文

君馬黃我馬蒼骨骼硤兀駿尾長前年逐寇出鳳翔去
年殺賊過武昌追風抹電勢莫當力窮氣乏一日委道
傍委道傍君莫歎將軍戰死白骨枯春草茫茫滿江岸

村社吟

馬肅

一春雨五戍晴鄉人齊說社公靈社公靈兮蠶麥熟五
穀豐登應可卜官家今年復免徵村村社社歌昇平人

人浣衣換穿著盡向祠前保安樂殺雞具黍仍烹豬喧
呼旋捉池中魚虔誠祭賽神人喜夔夔擂鼓高燒紙祠
前狎坐分尊卑社平分胙無高低痛飲狂歌不知夜家
家月下扶人歸老翁但愿身長健歲歲年年來祭奠

唐白雲序

曰叔敬詩格穩律熟
歌行雜體迫近古人

借君樂

都事葉伯顏初來婺源伯武作闕里樂
及去樂平再來婺源輒用前韻更為借

君樂汪以質見
和因復次韻

王 偁

由來浮世風波惡出險方知平地樂既安莫惜飲無何

醉來撫缶烏烏歌試看蜂蟻與狼虎尚有君臣知子父
鷓鴣雖異各安翔梟獍莫憐終自苦君家鱗溪四友堂
金削芙蓉照門廡幾思杖屨謁清崇短翮悠悠竟塵土
當年戎監託世姻安用告身銜褒嫗文章有神信蘇薛
端友直鋒知尹庾君能竭與尚書來鼓角危樓氣重鼓
又能和我借君篇使我聽雞中夜舞君不見高山流水
夕荒涼不是知音真不與又不見閨歌下管纔三終簫
韶九奏方未窮

撲燈蛾

呂諒

飛蛾愛毛羽棲息露草枝雖無霄漢翼翻翻適其時青
燈爾何與乃欲撲滅之焦頭不知戒既去還復來微軀
抗烈焰薄命終沾危不虞中奇禍自取非人為燃臍潤
郿塢燎塚翻秦屍膏液散煨燼糜爛已無遺嗟哉爾何
求滅身至於斯生死了不悟昏愚良可悲

程孝子行

靈山程遜父珙壽訢祖墳為人所平
縣官反罪珙壽遜求代縣官愧釋之

張文在

古墳為田栢為薪道傍草卧雙石人家家剪紙挂寒食
鳥烏銜作窠巢新新墳翻侵舊墳土爛體夜戴狐狸舞
百年無主使人哀有主那堪轉危苦程郎當年葬阿婆
六世四世玄孫多富豪平磨立棟宇貧者訴詞雁網羅
我問其名曰珙壽囊溢無錢空有口官長摸稜吏舞丈
反坐鞭笞誰汝救有子能為句讀儒不忍郎罷遭非辜
當庭請以身自代再拜以詩投大夫大夫讀詩色為動
慰遣温言與寬縱當時好事競傳誇遂有文人為歌諷

君不見漢時倉公遭重刑上書代罪聞緹縈錦袍仙人
歌樂府五男不如一女嬰莫道男兒不如女璫也于今
有斯舉假令代死亦不辭孝行勉旃天相汝

李將軍歌

吳訥

太倉積粟皆紅腐羣猶晝眠鼠變虎前鋒不見李將軍
何人為發千鈞弩去年我從昱嶺來匹馬馳突三關開
北平未入衛青幙郭隗獨上燕昭臺近聞西府羅俊彥
人人自謂能酣戰誰似當年背水軍赤幟纔臨趙城變

英雄報國如等閒
馬革裹屍銅柱間
明朝按劍收中山
謗書慎勿回天顏

鐵崖仙人歌為楊廉夫先生作

吳訥

鐵崖山中鐵笛仙
落花滿身花底眠
兩龍攜來東西語
蟠桃一醉三千年
偷桃更有東方子
拍天一笑天門裏
眼中九點齊州煙
案上小兒不如蟻
歸來跳入壺中天
鐵仙亦在蓬萊顛
回首樓船問瑤草
水弱雲深秋月老

先生有雙鐵笛名之曰
大鐵龍君小鐵龍君

東門柳送休寧丁縣尹

胡公留

東門柳不忍把相送不是不肯折柳條
令尹來時儂手種溪上船滔滔日東注
前時載尹來今日迎尹去去時船似來
時船肯學山陰選一錢松蘿下今年兒
童讀書父老耕田船去不用悲船來不
用喜竹馬梢梢揺綠尾便向東門迎御
史

從軍樂

汪廣洋

從軍樂右插忘歸左握槊天子有詔征不廷重選前鋒
掃幽朔出門萬里不足平宛駒照耀黃金絡去年鏖戰
葱嶺東今年分戍蓬婆中蓬婆城外一丈雪半夜紫駝
號北風少年忽憶慷慨事便起酌酒澆心曾酒酣耳熱
聲摩空手舞三尺青芙蓉前將軍右都護壯士在榮不
在富一朝手格樓蘭歸人擁都門看馳騫朝承恩暮承
顧出入三軍稱獨步都門富兒空萬數人生豈被從軍

誤

前有尊酒行

詹書

前有一尊酒後有三尺墳墳前兩樹花墳中不知春分
明記得墳中鬼曾共當年飲酒人

狹路相逢行

詹書

上有千丈之崖古鐵色下有無底之潭水俱黑中間小
道石艱澁君馬南我車北狹路相逢何偏仄安得來往
如康莊兩賢相讓無相阨

伯勞嘆

趙訪

伯勞食母母不育生子他巢遠其毒所生不免所養悲
五日羨臯還赤族人言子不孝良由母不仁何不遺卵
清溪濱不能辨非類禽鳥亦不智何不啄殺徒辛勤嗟
人至靈異禽鳥以義斷恩非滅親生子良由不自處鞠
育無術空尤人君不見若教一朝為餒鬼柁侯千載稱
宗臣

秋後雨

汪克寬

楚東五月天無雲日光流金百草焚南風吹山彭蠡涸

稻畦灼灼占龜文木郎無神龍不起牲牢熏燎徒紛紜
梧桐一葉炎官老雷車轆轤天瓢倒陂池泛溢失高低
萬槎青黃發枯槁白髮田翁半憂喜却憐久雨禾生耳
磨鑣欲獲泥濺胷累日陰霾黑千里何時木德守三星
五風十雨歌昇平

驪山老姥賜李密火星劔圖歌

汪克寬

蒲山銳額千年客蒲羈跨犢行無跡挂角青編一束書

夢對重瞳意相得昆吾寶匣三尺水
火星烟烟精光起
花冠仙姥授神奇拜起倉皇驚更喜
鞏南歃血盟玉槃
龍舟錦纜誅疵癥折簡唐公結昆弟
威稜六月嚴霜寒
豈知不學萬人敵雄才空覺乾坤窄
九卿裂地藏琯弓
稠桑土蝕銅花碧峩古樹蒼玉林
丹崖慘淡霾輕陰
龍津風雲歛爾化未須感慨荆軻心

續催送日鼓謠

鄧侍郎崖山作催送日鼓謠文丞相為書

汪德鈞

夔夔晨鼓催日注東方白日華欲動月無輝殺氣冲天
雲血色坎坎暮鼓擊日沒崦嵫黑朔風吹海毒波翻旄
頭錯落光芒出日復夜夜復日日夜相催鼓聲急枕戈
不寐食忘飧力不能支仰天泣主辱臣死古義存弟妹
飄零敢遑恤整旗收隊決雌雄黃龍孰遣橫江中風雷
晝晦天地變君臣不見崖山空至今濤聲吼朝夕半為
猿鶴為沙虫當時豪傑能幾子千載不泯惟孤忠催日
鼓送日鼓調短意長歌愈苦鮫人聞得淚成珠躑躅白

鷓鴣墮浦侍郎丞相家國同當時戮力無爾汝補天煉
石竟無功空餘五色神光吐斯人斯作世豈多合入青
編照今古

越城謠

程國儒

越州城城何高四十五里之周遭窪地填為基坡坨鑿
成濠白晝鞭笞夜擊橐石民之骨灰民膏越城雖高越
民勞越民勞勞未已我田未耕又科米忙忙築城歸種
禾又恐無米供官科禾苗未青得秋雨城吏打門夜如

虎為言雨後新城摧要我荷鋪城上來城泥不乾不敢
回又恐夜半聞春雷城頭一雨城一動越民登城向天
慟民心似與雨有讐天意實謂城無用當年當年天下
平天下無賊越無城乃知在德不在兵願無修城願修
德使民復覩無城日

信州糧謡

程國儒

信州糧糧何艱十鍾一石萬里間朝發錢王隄暮過嚴
子灘拖尾白浪如銀山朝度蘭溪州暮泊龍丘灣峻如

牽車上鬼關督吏持檄夜如箭布帆無風河水乾去年
糧船未及岸今年又運八百萬只知彼地荒不知浙東
天亦旱只知彼地饑不知役戶家無飯家無飯儂莫愁
願化鐵騎為耕牛願銷鋒鏑為鋤耰戰場闢作畝與溝
壯士負戈荷甲歸西疇風雨時調禾黍秋禾黍不秋飯
不足浙東又移何郡粟

枯魚過河泣

范準

長江之水萬里趨海門潮頭如山雪浪噴川珍水怪干

萬狀長鯨率領朝龍君一鱗失水枯已久猶想江波綠
於酒枯魚已枯何用泣豈貪釣餌遭羅縶大船擊鼓網
截流螯虬驚飛腥霧濕况此區區魴鱖輩那能圍圉常
同隊魚兮魚兮可奈何百川何處無驚波不如鯤鵬變
化辭溟漲九萬扶搖在風上

偶書李翰林筌篲引即韻成一曲

曹遷

仗劍欲屠龍張羅思捕虎男兒設心固有為文也非文

武非武調鉛傅村媪皺面成冶容唱籌夜量沙晨炊何
可春安知蜥蜴舉亦有風雷從物理不可測平地為高
峯我非女蘿絲安得附長松願持貞一志默默藏其蹤

禱神詞

呂旭

霜飛玉錢草痕紫蟾蜍啼秋月明死銀缸墮花愁夜色
佳人含愁訴郎伯為招神巫晨趣裝駕為帶綰羅襦裳
結束寫人詞下去汝代奴身奴送汝萬斛黃金賤如土
不惜神前訴奴苦乞靈願歸與阿郎齊眉偕老天年長

蒼鷹嘆

倪尚誼

蒼鷹養子巢樹巔綢繆牖戶完且堅日捕雞雛供子食
羽翮將成圖萬全山家少年不勝憤懸空百尺能扳援
巢傾子覆莫能保雄飛雌呼空盤旋君不見楚靈謂多
殺人子吾兒及禍理則然今觀鷲鳥情更苦搏擊奈何
終不悛

量田謠

吳祇

朝量水田雪暮量山田月青山白水人如雲朝暮量田

幾時歇尺田寸地須盡量絲毫增入毋留藏時暘時雨
欣時康我民欲報心未央年年增賦輸太倉但願山積
垂無疆安得長風天外起吹倒崑崙填海水更出桑田
千萬里

觀打栗行

吳斌

兩夫如飛猿攀條遶樹驚人覓長竿披霄拂煙霧紛紛
栗子墜若雲大栗已盡小栗空空遺孤樹號秋風我今
於此感萬事愁嘆躑躅何由終

長相思

吳鶯

長相思深閨幽梨花風冷春若秋夜看明月懸西樓
嫦娥相對增離憂別時初種庭前柳葉已成陰
榦如斗明朝願折相思條便風寄與雲中守

東屯吏

江敬弘

東屯吏老更貧鵠形帶索衣懸鶉官督開田背負薪
妻子撥置戶役頻去家萬里囊無銀天寒日暮愁殺人
死者大半逐淮塵少者隸名良苦辛後至擢用披雲津不

至保得骨肉親皇天無私贊經綸率土何莫非王臣臨
濠大尹廉且仁白馬御史上奏陳七年一半住壽春聖

澤霽霽丞相嗔丞相嗔聖澤霽霽何時勻

甲寅三月七日
放免六十

者丞相胡惟庸請
放免六十五者

遊子吟

唐文鳳

朝為遊子吟暮懷遊子悲遊子去日遠慈母將疇依母
髮白如雪子心皎如月但得子心如月圓照母白髮高

堂前

上東門行

唐文鳳

上東門在何所河陽城南瀍水滸舊時豪華今已空惟
有當年一抔土聞說漢家全盛秋門前列第皆王侯朱
輪翠轂日來往凝笳疊鼓長喧啾畫拱雕簷接宮觀十
里香塵飛不斷天上頻頒丹詔過民間屢免田租半白
髮老人不識兵間閭小兒歌太平關雞走馬尋常事豈
有紛紛愁嘆聲乞歸二傳章初上曾見公卿盛供帳道
傍觀者如雲屯雜綵從車凡幾輛韶華轉眼流星過倏

忽荆棘埋銅駝逢萌挂冠固已矣石勒倚嘯將如何往
事傷心難自保惆悵東門不能道君不見北邙山頭四
五陵土匣珠襦委荒草

謁潭謠

蘇大

謁潭古龍窟絕壁映澄泓龍去潭水濁龍來潭水清潭
水無風波龍居誰敢驚願龍常向此中住歲旱為民作
霖雨

新安文獻志卷五十